

Tienda di Educacion a wordo lanza oficialmente

Atravez di 161 mayor y educadornan por haya sosten y guia



ORANJESTAD (AAN): Ayera Diahuebs 10 di October a keda oficialmente lanza e asina yama Tienda di Educacion cual for di awor ta na disposicion di mayor y educadornan.

Jennifer Margareta, miembro di e organizacion a duna di conoce den un conferencia di prensa cu Tienda di Educacion ta e luga pa cualkier consejo of sosten cu bo mester den educacion di bo yiu. E ta conforma pa un grupo di profesionalnan cu ta disponible pa duna sosten y guia.

Corina Linsen, Coordinador di Tienda di educacion a sigui

bisa cu "educa un mucha no tur ora ta facil. Ta un reto pero tambe algo hopi special cu bo ta haci tur dia".

Segun Linsen, na 2008 CEDE Aruba a duna drs. Helen Gouda un opdracht pa haci un investigacion tocante abuso di mucha na Aruba. Den su conclusionnan, Sra. Gouda a haci cierto recomendacionnan y un di esakinan tabata cu mayor y educadornan tin un necesidad pa haya sosten y consejo di e educacion di nan yiu. Den esaki mester tene cuenta cu tur e diferente tipo di famia na Aruba y e personanan rond cu lo hunga un rol den e educacion di e

muchanan.

Esaki tabata e punto di saluda pa funda Tienda di Educacion. CEDE Aruba y Samenwerkende Fondsen di Hulanda a financia e proyecto aki y CEDE Aruba a tuma e iniciativa pa lanta e fundacion. Tienda di Educacion a wordo lanta como un fundacion, cu un directiva y cu trahadornan cu ta disponible tur dia, Corina Linsen a manifesta.

Nan ta basa nan mes den e articulo 18 di tratado di mucha. Esaki ta pone enfasis riba e desaroyo y educacion di muchanan y e responsabilidad di e mayornan of e tutor legal, sea mama, tata, wela, welo, madrastra, padrastro y tu otro



educadornan.

Tienda di Educacion ta pa tur hende cu ta encarga cu cuido di mucha y hoben di 0 pa 18 aña di edad y cu ta sinti e necesidad pa papia cu un profesional cu ta scucha, duna sosten, informa y conseha si bo tin pregunta tocante educacion y desaroyo di un mucha.

Bo por yama Tienda di Educacion na number di telefoon 161 y papia cu nan profesional tocante educacion. Bo por yama entre 8am y 11am y entre 4pm y 9pm.

Bo por subi riba nan website www.tdearuba.com pa haya informacion general tocante educacion of por manda un email cu bo

preguntanan. Bo lo ricibi un contesta den dos dia.

Corina Linsen a agrega cu mayor y educadornan tambe lo por participa den workshops tocante educacion cu TDE lo organisa. E agenda di e workshopnan lo bin riba e website.

Tur ayudo ta gratis y a base boluntario. Tur informacion ta keda confidencial y ta na bo persona pa determina ki tipo di ayudo bo mester y ki ora.

Tienda di Educacion ta spera cu comunidad di Aruba haci uso di e servicio aki door di yama 161 of door di e otro maneranan di contacto menciona ariba. Tienda di Educacion ta ubica na Pampunastraat 14, Dakota.